

LU LIBRU

Lu libru è na surgenti sana e pura
forsi la chiù lampanti chi ci sia;
purtari ti lu poi a villiggiatura
liggennulu lu Cori t'arricria.
Si ci lu trovi 'nmanu a tò signura
nun'hai aviri nudda gelusia;
senza chi ti dumanna un cuntributu
e sì sicuru ch'un ti fà curnutu.

Lu libru è l'amicu chiù fidatu
a cu lu leggi lu Cori cci alleta,
'nta li sò fogghi ci trovi stampatu
lu Cori d'un grannissimu Pueta;
a tutti li Pueta ch'annu natu
ci fù assignata a tutti a stessa mèta;
pirchè un Pueta pò 'nsegnari
l'omu comu s'avissi a cumpurtari.

A tutti li Pueta chi ci sia
ch'esistinu na tuttu l'universu,
iò li descrivu tutti comu mia:
l'esempiu lu pigghiu di mia stessu;
si viù a unu chi chiangi pi via
chiangennu puru ci curru d'appressu.
La musa 'ncori stampatu ni teni
sapiri sulamente fari beni .

LU CCHIU' FORTI

Na bedda vota lu sulì e lu ventu
essennu tutti dui sfaccinati
accuminciaru 'n'arrangiamentu
cuntannu ognunu li sò spaccunati.
Lu sulì dissi: «U cchiù forti mi sentu».
Lu ventu ci risposi: «Un vi vantati»
(e misiru scummissa a manu a manu
cu si firava spugghiari un cristianu).

Lu primu fu lu ventu a cuminciari
puntannu a un viddaneddu chi spuntau;
comu dannatu si misi a ciuciari
ma lu viddanu cchiù si 'ncappucciau.
Mischinu nun si potti riparari
pirchè lu ventu si lu trasportau,
lu fici terra terra ruzzuliari
ma mancu lu cappotto ci livau.

Dopu du ventu lu sulì pruvau
cu dda ducizza chi fa spasimari.
Araciu araciu li raggi 'nfucau,
si 'ntisi lu viddanu suffucari;
difatti lu cappotto si livau,
c'un fazzulettu misi a frisculiari
e stancu addichinutu s'assittau
all'ummira d'un pignu a ripusari.

Si misiru di novu a raggiunari,
lu sulì pritinnia la scummissa.
Lu Governu Talianu a lu passari
tinni l'aricchi a sentiri sta rissa,
poi loccu loccu ci misi a 'ncugnari
e ci rispusi: «La forza unn'è chissa.
Ca forza ch'aiu iò vi l'assicuru,
sugnu capaci di lassallu nuru!»

L'AMICIZIA

È riccu l'omu quannu c'havi amici,
però pi cunfirmallu l'a pruvari,
un muttu anticu c'è ch'ancora dici
di lu chiù megghiu amicu t'ha guardari.
Sai n'amicu na vota chi fici?
Si misi a lu zù Bertu a friquintari;
addivintaru amici di famigghia
ma poi si ni fuiu cu sò figghia.

La sira quannu chi si ni fueru
dintra un casottu la notti passaru.
Iò pi li mè virtù sennu sinceru
nun mi 'nteressa soccu cumminaru;
criu chi prima chi s'addurmisceru
certu qualchi capricciu s'u passaru;
«e quannu iddu poi s'arruspigghiau
la lassa dda curcata e s'a sgrignau».

Dda picciuttedda quannu si susiu
e a iddu dda rintra un nu trovau,
chiangennu dissi: ci pinzirà Diu
pi chissu chi l'onuri mi livau;
poi sutta la botta risulviu
si misi 'ncerca fina c'u trovau;
difatti a longa manu lu seguìu
fina chi vitti dunnì si 'nfilau.

Fici un prugettu chi ci rinisciu,
cartucci e na pistola s'accattau,
d'un'eleganti omu si vistiu,
un beddu mustazzuni s'appizzau.
Trasennu dintra un bar lu scupriu
e nmezzu a tanti dda lu svirgugnau;
poi ci dissi: ci penzi schifiu?
Ci spara cinqu corpa e l'ammazzau.

Ma dopo pocu tempu s'accurgiu
chi era 'ncinta: nun si scuraggiau.
Sula comu na cani parturiu
lu sò nutricu si lu sustintau;
e cu l'aiutu chi ci retti Diu
fina a la quarta scola lu mannau;
poi parteru pi lu cuntinenti
di tannu 'mpoi un si sappi chiù nenti.

PREGHIERA DI L'EMIGRANTI

(Premiata al primo premio «Nino Di Nuovo», 3 Ottobre 1982)

Vergini matri tu m'ha pirdunari
di stu piccatu ch'è pisanti assai:
quannu li scarpi mi sappi attaccari
di mè matruzzà mi ni dispisai.
Quantu ricchizzi sunnavi accuddari
però la rialtà nun la truvai,
ora pintutu vogghiu riturnari
e gorimi dda vecchia chi lassai.

Fammi turnari arrè na dda casuzza
tirrana, smarunata e ciacatizza
chi fabbricò mè patri bon'Armuzza
nun calculannu tempu nè stanchizza:
prima chi Cristu li jorna m'accurza,
fammi pruvare arrè la cuntintizza
di strinciri a lu pettu mè matruzza,
chi pi stu cori è l'unica ricchizza.

Fammi turnari arrè 'ntra li sò vrazza
dunni mi fici ddi sonni nnuccenti.
La sò privanza lu cori mi strazza,
l'arma e lu corpu cuntinuamenti:
iò mi cuntentu di pani e sputazza
e nò subiri sti maltrattamenti
(vinnutu comu lu pani a la chiazza
e disprizzatu di tutta la genti).

Fammi turnari arrè dintra dd'agnuni
na dda casuzza dintra ddu curtigghiu
dunni chi mè matruzza addinucchiuni
prega e chianci sempri pi stu figghiu:
qualchi ghiurnata scappu a l'ammucciuni
e comu arrivu 'nmrazza mi la pigghiu,
muremu dda diuni tutti rui
abbasta chi mè matri un chianci chiui.

PRIMA SAGRA DU MILUNI
PACECO 23 AGOSTU 1980

Pacecu di na donna fù fundatu
discinnenti di principi e baruna,
di massimi biddizzi circuntatu
di vigni, d'oliveti e di limuna;
di genti onuratissima abbitatu
livannuci na pocu scarafuna;
ma di lu Munnu tennu lu primatu
sù spicialista pi fari miluna.

Cunsidirati tutti l'abitanti,
braccianti, burgiseddi e burgisuna
senza scartari a nuddu tutti quanti
hannu stu preu mettiri miluna;
e ci partinu tutti un'annu avanti
'nchianura, ne custeri, ne timpuna.
Lucianu, Salvaturi o Nazzarenu
pensanu prepararari lu tirrenu.

Poi n'aprili tutti acchiffarati
ognunu usirà la sò sperienza,
si fannu tutti ddi fossa alliniati
sistiati tutti cu na bedda lenza;
sù di sururi tutti assammarati
ed 'a la fini poi pi ricumpenza
doppu chi l'annu beddi siminati
li surci ci v'è mangianu a simenza.

Tannu sfoganu tutti a santiuna
poi rassignati cu tanta pacienza
cu autobotti, cu fusti e biduna
cu metti acqua, cu metti simenza.
Fussi duviri di ogni pirsuna
aviri tanta di ricunuscenza,
la gran fatica di sti pacicoti
di siminalli tanti e tanti voti.

Ma dopu tutti sti cummattimenti
pari c'affaccia un pocu d'alligria
ed 'ogni gnornu è ddà sempri prisenti
si metti a culu a ponti e scafunia;
ritorna ncasa chè tuttu cuntenti
dicennu: qualchèr'unu spuntunia;
m'appena nati c'è natru sdirrupu:
sunnù mangiati di lu vermi lupu.

Cumencia n'atra vota a bistimmiari
soccu cummina un vi lu sacciu riri;
si metti na ddù fossu a scafuniari
lu vermi è ancora ddà ma nun lu viri;
turnatu ncasa un si ci pò parlari,
mischinu havi cosi di 'nfuddiri;
e lu n'umani di capa matina
si metti 'ncerca pi la medicina.

Quannu la midicina capitau
mischinu lu prublema u risulviu,
pi tuttu lu tirrenu la straviau,
tutti di vermi chi c'era struriu;
poi vinni giugnu la terra quariau
tempu di nenti la troffa crisciu;
tuttu priatu taliava ddi foggli
spera d'ovannu livari li 'mrogghi.

Cunsidirati chi ranni alligria
la cuntintizza ch'unn'haviti rea,
e tutti i iorna ddà gira e firria,
pinzati: mischineddu si nì prea.
Ci dici a so mughieri: Rosalia
speru ch'ovannu maritamu a Lea;
ma cù surprisa vitti na matina
na troffa appigghiatedda di risina.

LA PACICOTA

Siddu mi criri, è na simpaticuna
la sò parlata libira e baggiana.
Si senti di lu Munnu la patruna,
la caminata nobili e spartana;
la sò taliata comu d'ù spuntuna
spirtusa lu tò cori e lu trapanu;
ti fà pigghiari petri a muzzicuna
e idda si ni prea e s'alliana.

Si ti 'nmriachi, idda sinn'adduna
cu l'occhi di na vulpi iuculana,
accetta li carizzi e li vasuna
però nun fari na pinzata strana:
si nun ti la mariti, un ti lu runa
un sghicciu d'acqua di la sò funtana.

CANTU A LA ME ' TERRA

Trapani s'è vasata di lu mari
di la risacca chi si movi e smovi,
chiù ti taliu chiù bedda mi pari
bedda sutta lu sulì e quannu chiovi,
turisti chi ti vennu a visitari
ci fai fari matascini novi;
'ssi tò biddizzi, nò nun li canciari
ma resta d'accussì comu t'attrovi.

Appena chi la genti ci sù ghiunti
girannu l'occhi versu lu livanti,
'mpunenti, maistusu c'è lu munti
cu li tò manu pari chi l'agguanti,
cu li biddizzi soi nun c'è cunfrunti
riccu di suori, di parrini e santi;
però nun perdi tempu si li cunti
pirchè li chiesi sù sempri vacanti.

Di ddà scuprennu tuttu l'infinitu
lu Cori veramente s'arrichia;
pi tumazzu e ricotta santu Vitu,
pi fimmini bidduna Bonaggia,
Casteddamari pisci sapuritu
si lu gustati cu spezi e lumia;
Calatafimi, 'nmezzu ddi timpuna
acqua miraculosa e bastarduna.

Si giri l'occhi versu la marina
parola d'omu diventi curiusu,
di visitari ddi beddi villina
e Alcamu 'mpunenti e maistusù;
e siddu trasi dintra na cantina
ci trovi vinu lampanti e gustusu;
ti fà affacciari 'mmucca l'acqualina
e linna, linna scinni a ghiri iusu.

Salemi, Vita di biddizza rara
timpuna, la chianura, lu pinninu,
Partanna pi li vigni e la ciumara
l'acqua chi scurri sempri di cuntinu;
pi pisci e piscarecci, va a Mazzara
e a Castelvetrano l'ogghiu finu;
e Gibellina ch'è a tutti notu
sfasciata ancora di lu tirrimotu.

Quantu biddizzi ci sunnu a Marsala
dispinzuna di vinu chini chini,
l'occhju talia ma lu cori sciala
pi ddù beni di Diu 'ntra li iardini;
quantu signurineddi scala scala
mentri cogghinu aranci e mandarini;
omini, armati di cartedda e pala
vannu niscennu sali di salini.

'Nmezzu lu mari versu lu punenti
ci sù ncastrati trè beddi diamanti;
l'Egati li tri isuli 'mpunenti
mètà di nnamurati e di bagnanti;
dumannu scusi a tutti li prisenti
si vegnu a chiuru sti mè duci canti;
na stù PACECU ch'è terra mia
surgenti granni di la PUISIA.

LU ZAPPUNI DI ME' NANNU

Me nannu bon'armuzza na iurnata,
na ddi mumentu tristi d'agunia,
di li niputi fici n'adunata
e na cusuzza l'unu ni spartia.
Cu la sò vucca sempri 'nzucarata
cu l'armi all'occhi mi dissi: talia,
darrè la cascia sutta la pinnata
c'è na cusuzza sarvata pi tia.

Trasivi, ci truvai stu zappuni.
Me nannu dissi: pigghiatillu tù.
Mi lu purtavi 'ncasa cuntintuni,
pi cinquant'anni cumpagnu mi fù.
Ni fici lotti munnazzu spurcuni
zappamu cinquant'anni a tù pi tù;
ristau 'ntattu lu gran lazzaruni
ma iò mi ridduci ch'un servu chiù.

CU SOFFRI

Di civiltà si parla e di prugressu
d'onuri, di murali e dignità;
iò nveci lu descrivu, tempu persu
ch'esisti sempri la malvagità;
siddu girati tuttu l'Universu
na stirpi nun si trova comu ccà;
perciò la varca nun pò ghiri a versu
pi curpa di la gran dionestà.

Qualunqui ditta, quali pigghia pigghia
'ntra milli c'è qualcuna chi s'a sgagghia,
pirchè sù misi tutti a picatigghia
puntannu l'arma contru a cu travagghia;
l'upirau, sparagna e s'assuttigghia
ma comu cira la misata squagghia;
ma nun'è giustu: tutti na famigghia
cu s'abbuttura e cu soffri e baragghia.

E l'upiraiu abbuza e s'affliggi
si danna, si dispera, s'avvilisci;
la fami è l'arma chi reca pruriggi
ma sempri a lu chiù debuli culpisci;
tra russi, viridi, blù, cilesti e griggi
già tutta l'assemblea si riunisci;
ma a soccu servi furmari na liggi
quannu chi nuddu c'è chi l'eseguisci?

Lu senza parti, la prudenza sduna
l'omu nun penza chiù cuntegnu e affruntu,
li uvita si li sfarda a muzzicuna
quannu si viri trattatu a stu puntu;
riclama, etta vuci, s'appurmuna
ma ammatula si sgargia a sciatu iuntu;
sdirrupa lu purtuni a tuppuliuna
ma nuddu mascaratu duna cuntu.

L'URFANEDDA VIDUVA

– Basta un chianciti chiù, Donna Virginia
– E comu mi cunortu Donna Tania?
Megghiu chi lu Signuri mi stirminia
pi quantu almenu mi leva sta smania.
Pi lu Guvernu siguri sta linia
aiu tri morti 'nta la terra strania;
mè patri morsi 'nguerra a l'Abissinia
mè frati e mè maritu a la Germania.

Ca dintra discurianu na sira
pinzannu chi travagghiu nun ci nn'era,
pi guaragnari na misira lira
ristaru morti dintra na miniera,
dunni chi nuddu c'adduma na cira
e nuddu fa pi iddi na prighiera.